

(清) 傅澤洪 黎世序 等 主編 鄭元慶 俞正燮 等 纂輯

行水金鑑

續行水金鑑

(附分類索引)

2

(清) 傅澤洪 黎世序等 主編 鄭元慶 俞正燮等 纂輯

行水金鑑 續行水金鑑

(附分類索引)

2

行水金鑑

(清)

傅澤洪 主編
鄭元慶 纂輯

卷十四至卷三十三

行水金鑑

卷第十四

河水

宋哲宗紹聖元年冬十月丁酉河北流十二月己丑漳

河決溢浸沼磁等州令計置堙塞

宋史哲宗本紀 熙寧導東流而北流閉至是河竟北流至元

符二年東流遂斷絕

宋哲宗紹聖二年秋七月庚戌河北流漲沒民田廬遣

官振之

宋史哲宗本紀

七月戊午詔沿黃河州軍河防決溢並即

申奏

宋史河渠志

紹聖末都水使者議建廣武四埽石岸朝廷

命先治岸數十步以驗其可否黃流湍悍役人多死一

方甚病功不可成而使者申前說愈力文瓘條別利害

罷其役

宋史謝文瓘傳

宋哲宗元符元年澶州河溢冬十月丁酉以河北京東

河溢遣官振卹

宋史哲宗本紀

宋哲宗元符二年二月乙亥北外都水丞李偉言相度大小河門垂此水勢衰弱並先修閉各立蛾眉埽鎮壓乞次於河北京東兩路差正夫三萬人其他夫數令修河官和僱三月丁巳偉又乞於澶州之南大河身內開小河一道以待漲水紓解大吳口下注北京一帶向著之患並從之六月末河決內黃口東流遂斷絕八月甲戌詔大河水勢十分北流其以河事付轉運司責州縣共力救護隄岸辛丑左司諫王祖道請正吳安持鄭佑李仲李偉之罪投之遠方以明先帝北流之志詔可

宋史

河渠志

六月久雨河北大水河溢漂人民壞廬舍

宋史五行志

十二年

月壬辰詔河北黃河退灘地聽民耕墾免租稅三年

宋史

哲宗本紀

先是治平二年始命都水監浚二股五股河以紓恩
冀之患熙寧二年從宋昌言程昉議開二股以導東
流裁及六分而北流閉河自其南四十里東決汜濫
大名恩德滄永靜五州軍境三年令河北轉運司開
修二股上流四年北京新堤第四第五埽決下屬恩
冀貫御河五年二股河成深十一尺廣四百尺而新
隄決口亦塞又以水或橫決散漫常虞遏壅命范子
淵于第四第五埽開修直河使大河還二股故道十

年大決於澶州之曹村

在今開州西南

河道南徙東匯于梁山

張澤灤分爲二派一合南清河入淮一合北清河入

海凡灌郡縣四十五而濮濟鄆齊尤甚壞田逾三十

萬頃元豐元年決口塞詔改曹村埽曰靈平四年澶

州小吳埽大決河復注御河詔東流已填淤不可復

將來更不修閉元祐中復議回河久之不決而紹聖

初吳安持李偉卒行之然東流堤防未固瀕河多被

水患元符二年河決內黃口東流斷絕詔大河水勢

十分北流其共力救護隄岸是後不復開二股矣

漳水故禹河也清河行漳水之南大河故瀆之北去

禹河最近治河者欲復禹舊迹莫如導黃河入白溝

以人力爲之其可也而况商胡自決北流通快海口
廣深此誠千載一遇因禍而爲福轉敗而爲功在此
時矣爲當日計但能于魏恩冀滄之境寬立隄防約
攔水勢疏其壅積遏其衝要則此河雖不逮禹功猶
得比王景之所治千年可以無患而朝議紛紜必欲
回河使東六塔旣敗二股更興至元豐四年河又北
流而神宗之意息矣王安石委任程昉范子淵濬川
之杷幾于以河爲戲陳祐甫援李垂之策請復西河
故瀆帝愛惜民力亦莫之許也哲宗即位復議回河
大畧謂河尾北向恐入契丹之地則其界踰河而南
彼必爲橋梁守以州郡中國全失險阻而蘇轍駁之

以爲契丹之河南注于海地形北高河無北徙之道而海口深浚勢無徙移范百祿亦云界河向去深闊加以朝夕海潮往來渲蕩必無淺澱河尾安得直注北界是亦足以解其惑已而紹聖諸臣力主東流閉斷北口蓋借河事以伸其紹述之說意不在河更無足論元符二年河復決而北地勢可知而建中靖國初猶有獻東流之議者蝸蟻沸羹一唱百和自慶曆以來五十餘年凡發言盈庭之日皆坐失機會之日也卒委其地于金源氏而河益南徙濬滑汲胙之間化爲平陸豈不惜哉

禹貢錐指

宋哲宗元符三年正月己卯徽宗即位鄭佑吳安持輩

皆用登極大赦次第牽復中書舍人張商英繳奏佑等
昨主回河皆違神宗北流之意不聽商英又嘗論水官
非其人治河當行其所無事一用堤障猶塞兒口止其
啼也三月乃以商英爲龍圖閣待制河北都轉運使兼
專功提舉河事商英復陳五事一曰行古沙河口二曰
復平恩四掃三曰引大河自古漳河浮河入海四曰築
御河西堤而開東堤之積五曰開木門口泄徒駭河東
流大要欲隨地勢疏濬入海會四月河決蘇村七月詔
商英毋治河止釐本職其因河事差辟官吏並罷復置
北外都水丞司

宋史河渠志

宗武第進士韓忠彥鎮瀛州辟爲

河間令值河溢增堤護城吏率兵五百伐材近郊雖莖

木亦不免父老遮道泣宗武入府白罷之徽宗即位爲

秘書丞

宋史韓宗武傳

宋徽宗建中靖國元年春尚書省言自去夏蘇村漲水
後來全河漫流今已淤高三四尺宜立西堤詔都水使
者魯君貺同北外丞司經度之于是左正言任伯雨奏
河爲中國患二千歲矣自古竭天下之力以事河者莫
如本朝而徇衆人偏見欲屈大河之勢以從人者莫甚
于近世臣不敢遠引祇如元祐末年小吳決溢議者乃
譎謀異計欲立竒功以邀厚賞不顧地勢不念民力不
惜國用力建東流之議當洪流中立馬頭設鋸齒梢芻
材木耗費百倍力遏水勢使之東注陵虛駕空非特行

地上而已增堤益防惴惴恐決澄沙淤泥久益高仰一旦決潰又復北流此非堤防之不固亦理勢之必至也昔禹之治水不獨行其所無事亦未嘗不因其變以導之蓋河流混濁泥沙相半流行既久迤邐淤澱則久而必決者勢不能變也或北而東或東而北亦安可以人力制哉爲今之策正宜因其所向寬立堤防約攔水勢使不至大段漫流若恐北流淤澱塘泊亦祇宜因塘泊之岸增設堤防乃爲長策風聞近日又有議者獻東流之計不獨比年災傷居民流散公私匱竭百無一有事勢窘急固不可爲抑亦自高注下湍流奔猛潰決未久勢不可改設若興工公私徒耗殆非利民之舉實自困

之道也

宗史河渠志

宋

崇寧二年

岳飛生未彌月河決內黃水暴至母姚抱飛坐甕

中衝濤及岸得免人異之

宋史岳飛傳

按飛死於紹興十一年辛酉飛年三十九逆數至徽宗崇寧二年癸未乃

飛所生之年也

宋徽宗崇寧三年十月臣僚言昨奉詔措置大河即由

西路歷汧邊州軍回至武強縣循河堤至深州又北下

衡水縣乃達于冀又北渡河過遠來鎮及分遣屬僚相

視恩州之北河流次第大抵水性無有不下引之就高

決不可得况西山積水勢必欲下各因其勢而順導之

則無壅遏之患詔開修直河以殺水勢

宗史河渠志

宋徽宗崇寧四年二月工部言乞修蘇村等處運糧河

堤爲正堤以支漲水較修棄堤直堤可減工四十四萬料七十一萬有奇從之閏二月尚書省言大河北流合西山諸水在深州武強瀛州樂壽埽俯瞰雄霸莫州及沿邊塘灤萬一決溢爲害甚大詔增二埽堤及儲蓄以備漲水是歲大河安流

宋史河渠志

宋徽宗崇寧五年二月詔滑州繫浮橋于北岸仍築城壘置官兵守護之八月葺陽武副堤

宋史河渠志

杜常崇寧中

至工部尚書以龍圖閣學士知河陽軍大河決直州西上埽勢危甚常親護役徙處埽上埽潰水溢及常坐而止於是役人盡力河流遂退郡賴以安

宋史杜常傳

宋徽宗大觀元年二月詔於陽武上埽第五鋪開修直

河至第十五鋪以分減水勢有司言河身當長三千四百四十步面闊八十尺底闊五丈深七尺計役十萬七千餘工用人夫三千五百八十二凡一月畢從之十二月工部員外郎趙霆言南北兩丞司合開直河者凡為里八十有七用緡錢八九萬異時成功可免河防之憂而省久遠之費詔從之

宋史河渠志

是年京東水河溢

宋史徽宗本紀

是

年夏大水河北京西河溢漂溺民戶

宋史五行志

宋徽宗大觀二年五月霆上免夫之議大畧謂黃河調發人夫修築埽岸每歲春首騷動數路常至敗家破產今春滑州魚池埽合起夫役嘗令送免夫之直用以買土增貼埽岸比之調夫反有贏餘乞詔有司應埽合

調春夫並依此例立爲永法詔曰河防夫工歲役十萬
濱河之民困于調發可上户出錢免夫下户出力充役
其相度條畫以聞丙申邢州言河決陷鉅鹿縣詔遷縣
于高地又以趙州隆平下濕亦遷之六月己卯都水使
者吳玠言自元豐間小吳口決北流入御河下合西山
諸水至清州獨流砦三義口入海雖深得保固形勝之
策而歲月寢久侵犯塘堤衝壞道路齧損城砦臣奉詔
修治隄防禦捍漲溢然築八尺之堤當九河之尾恐不
能敵若不遇有損缺逐旋增修即又至隳壞使與塘水
相通于邊防非計也乞降旨修葺從之庚寅冀州河溢
壞信都南宮兩縣

宋史河渠志

是年八月辛巳邢州河水溢壞